

職方典第一百三十二卷

廣平府部紀事

通鑑周莊王十一年魯莊公八年齊侯田於貝丘

定王十三年魯宣公十五年六月癸卯晉荀林父敗赤狄於曲梁

靈王二年魯襄公三年單子晉侯宋公魯侯衛侯鄭伯莩子邾子齊世子光同盟於雞澤晉悼公三年晉侯弟楊干亂行於曲梁魏絳戮其僕

敬王六年魯昭公二十八年公如晉次於乾侯

敬王二十三年晉定公十五年趙鞅使邯鄲欲

殺大夫午午與中行寅范吉射親攻之趙稷涉賓以邯鄲反晉君使籍秦圍邯鄲 敬王二十六

年晉定公十八年中行文子奔邯鄲

敬王二十九年晉定公二十一年趙鞅拔邯鄲竟有之

廣平府志邯鄲人正旦獻鳩於趙簡子簡子厚賞其人而放之客曰正旦放鳩示厚恩也得賞人競捕之不如勿賞簡子曰善

威烈王十六年晉烈公十年齊田汾及邯鄲韓舉戰於平邑師敗獲舉

顯王三年趙敬侯二十一年魏圍邯鄲明年拔之

顯王六年趙敬侯二十四年魏歸邯鄲與盟

於漳水上

顯王二十年趙肅侯元年公子范襲邯鄲不勝而死之

戰國策蘇秦從燕之趙始合從說趙王曰天下之卿相人臣乃至布衣之士莫不高賢大王之行義皆願奉教陳忠於前之日久矣雖然秦陽君妬大王不得任事是以外賓客遊談之士無敢盡忠於前者今秦陽君捐館舍大王乃今然後得與士民相親臣故敢進其愚忠爲大王計莫若安民無事請無庸有爲也安民之本在於擇交擇交而得則民安擇交不得則民終身不得安請言外患齊秦爲兩敵而民不得安倚秦攻齊而民不得安倚齊攻秦而民不得安故夫謀人之主伐人之國常苦出辭斷絕人之交願大王慎無出於口也請屏左右自言所以異陰陽而已矣大王誠能聽臣燕必致氈裘狗馬之地齊必致海隅魚鹽之地楚必致橘柚雲夢之地韓魏皆可使致封地湯沐之邑貴戚父兄皆可以受封侯夫割地效寶五霸之所以覆軍禽將而求也封侯貴戚湯武之所以放殺而爭也今大王垂拱而兩有之是臣之所以爲大王願也大王與秦則秦必弱韓魏與齊則齊必弱楚魏魏弱則割河外韓弱則効宜陽宜陽効則上郡絕河內割則道不通楚弱則無援此三策者不可

不熟計也夫秦下軹道則南陽動劫韓包周則趙自銷鑠據衛取淇則齊必入朝秦欲已得行於山東則必舉甲而向趙秦甲涉河踰漳據番吾則兵必戰於邯鄲之下矣此臣之所以爲大王患也當今之時山東之建國莫如趙強趙地方三千里帶甲數十萬車千乘騎萬匹粟支十年西有常山南有河漳東有清河北有燕國燕固弱國不足畏也且秦之所畏害於天下者莫如趙然而秦不敢舉兵甲而伐趙者何也畏韓魏之議其後也然則韓魏趙之南蔽也秦之攻韓魏也則不然無有名山大川之限稍蠶食之傳之國都而止矣韓魏不能支秦必入臣於秦秦無韓魏之隔禍必中於趙矣此臣之所以爲大王患也臣聞堯無三夫之分舜無咫尺之地以有天下禹無百人之聚以王諸侯湯武之卒不過三千人車不過三百乘而爲天子誠得其道也是故明王外料其敵國之強弱內度其士卒之衆寡賢與不肖不待兩軍相當而勝敗存亡之機節固已見於胷中矣豈掩於衆人之言而以冥冥決事哉臣竊以天下地圖案之諸侯之地五倍於秦料諸侯之卒十倍於秦六國并力爲一西向而攻秦秦破必矣今西面而事之見臣於秦夫破人之與破於人也臣人之與臣於人也豈可同日而言之哉夫橫人者皆割諸侯之地以與秦成與欲秦成則高臺榭美宮室聽竽笙琴瑟之

音察五味之和前有軒轅後有長庭美人巧笑卒有秦患而不與其憂是故橫人日夜務以秦權恐喝諸侯以求割地願大王之熟計之也臣聞明主絕疑去讒屏流言之迹塞朋黨之門故尊王廣地強兵之計臣得陳忠於前矣故竊爲大王計莫如一韓魏齊楚燕趙六國從親以償畔秦令天下之將相相與會於洹水之上通質刑白馬以盟之約曰秦攻楚齊魏各出銳師以佐之韓絕食道趙涉河漳燕守常山之北秦攻韓魏則楚絕其後齊出銳師以佐之趙涉河漳燕守雲中秦攻齊則楚絕其後韓守成臯魏塞午道趙涉河漳博關燕出銳師以佐之秦攻燕則趙守常山楚軍武關齊涉渤海韓魏出銳師以佐之秦攻趙則韓軍宜陽楚軍武關魏軍河外齊涉渤海燕出銳師以佐之諸侯有先背約者五國共伐之六國從親以償秦秦必不敢出兵於函谷關以害山東矣如是則霸業成矣趙王曰寡人年少蒞國之日淺未嘗得聞社稷之長計今上客有意存天下安諸侯寡人敬以國從乃封蘇秦爲武安君節車百乘黃金千鎰白璧百雙錦繡千純以約諸侯

張儀爲秦連橫說

趙王曰敝邑秦王使臣敢獻書於大王御史大王收率天下以償秦秦兵不敢出函谷關十五年矣大王之威行於天下山東敝邑恐懼懾伏繕甲厲兵節車騎習馳射力田積粟守四封之內愁居懾

處不敢動搖惟大王有意督過之也今秦以大王之力西舉巴蜀并漢中東收兩周而西遷九鼎守白馬之津秦雖僻遠然而心忿悁含怒之日久矣今寡君有敝甲鈍兵軍於澠池願渡河踰漳據番吾迎戰邯鄲之下願以甲子之日合戰以正殷紂之事敬使臣先以聞於左右凡大王之所信以爲從者恃蘇秦之計秦熒惑諸侯以是爲非以非爲是欲反覆齊國而不能自令車裂於齊之市夫天下之不可一亦明矣今楚與秦爲昆弟之國而韓魏稱於東藩齊獻魚鹽之地此斷趙之右臂也夫斷右臂而求與人鬪失其黨而孤居求欲無危豈可得哉今秦發三將軍一軍塞午道告齊使興師渡清河軍於邯鄲之東一軍軍於成臯歐韓魏而軍於河外一軍軍於澠池約曰四國爲一以攻趙破趙而四分其地是故不敢匿意隱情先以聞於左右臣竊爲大王計莫如與秦遇於澠池面相見而身相結也臣請案兵無攻願大王之定計趙王曰先王之時奉陽君相專權擅勢蔽晦先王獨制官事寡人宮居屬於師傅不得與國謀先王棄羣臣寡人年少奉祠祭之日淺私心固竊疑焉以爲一從不事秦非國之長利也乃且願變心易慮剖地謝前過以事秦方將約車趨行而適聞使者之明詔於是乃以車二百乘入朝澠池割河間以事秦

武靈王十三年楚魏王來過邯鄲

趙武靈夢處女鼓琴而歌詩曰美人熒熒兮顏若哲之榮命乎命乎曾與我嬴異日王飲酒樂數言所夢想見其狀吳廣聞之因納其女姓孟嬴姚甚有寵於王是爲惠后生子何

武靈既傳國子

何乃變服略地欲從雲中九原直南襲秦乃詐爲使者入秦秦昭王不知已而怪其狀甚偉非人臣之度使人逐之而已脫關矣審問之乃主父也秦人大驚

主父遊沙丘異宮遭章之亂被公子成及李兌圍之不得出又不得食探爵轂食之三月餘餓死

赧王三十四年趙惠文王十八年大潦漳水溢

扁鵲過邯鄲聞貴婦人卽爲帶下醫

赧王三十八年趙惠文王二十二年大疫

赧王四十二年惠文王二十七年河水出大潦

楚會諸侯魯趙俱獻酒酒吏怒趙乃以魯薄酒易趙厚酒奏之楚王以趙酒薄故圍邯鄲

孝成王夢衣偏燦衣乘飛龍上天不至而墜見金玉之積如山明日召筮史占之以爲不祥後三日

韓上黨守背秦來獻地秦怒與趙戰於長平坑趙卒四十萬蓋其應云

赧王五十六年孝成王七年秦圍邯鄲八年楚魏來救邯鄲圍解

荆軻遊於邯鄲魯勾踐與荆軻博爭道魯勾踐怒而叱之荆軻嘿然逃去遂不復會後勾踐聞軻刺秦王私曰嗟乎惜哉其不講於刺劍之術也向者吾叱之彼以我爲非人也

呂不韋賈於邯鄲見秦質子子楚曰此奇貨可居買姬獻之生子政爲始皇帝不韋封文信侯始皇十九年王翦伐趙虜王遷秦王如邯鄲與母家有讎者俱殺之

二世元年楚將武臣至邯鄲自立爲趙王

燕將囚趙王武臣張耳陳餘患之有廝養卒說燕與趙王載歸

邯鄲人數百家有祭祀別設客位祀公孫杵臼與程嬰

邯鄲郭縱以鐵冶成業與王者埒富

二年趙將李良襲邯鄲殺武臣章邯兵至邯鄲徙民於河內夷其城郭

漢王三年韓信張耳擊趙趙王歇與成安君陳餘聚兵井陘口

漢書高祖本紀十年九月代相國陳豨反上曰豨嘗爲吾使甚有信代地吾所急故封豨爲列侯以

相國守代代乃與王黃等劫掠代地吏民非有罪也能去豨黃來歸者皆舍之上自東至邯鄲上喜曰豨不南據邯鄲而阻漳水吾知其亡能爲矣問樂毅有後世乎乃封其孫樂叔於樂鄉號華成君封趙壯士四人各千戶

漢呂后元年夏五月趙王宮叢臺災

景帝二年邯鄲狗與彘交 景帝五年趙王與吳楚合謀反酈寄樂布引水灌城王自殺邯鄲降

武帝太始四年趙有蛇鬪

元帝永光五年河決清河靈鳴犢口

成帝鴻嘉四年秋河溢清河郡詔賑貸

趙王彭祖上書願督國中盜賊常夜從走卒行徼邯鄲中諸使過客以彭祖險陂莫敢留邯鄲

新莽始建國二年河決泛清河

天鳳二年邯鄲以北大雨水

莽改廣平國曰富昌曲梁曲周曰直斥丘曰利丘清河曰河平

王莽初邯鄲等處市長爲五均

置交丞五人錢府丞一人

更始元年光武至邯鄲劉林請決列人水灌城不從十二月王郎據邯鄲郎一名昌邯鄲人素爲卜相工明星曆常以爲河北有天子氣詐稱眞成帝子子與更始元年十二月劉林等率車騎數百晨入邯鄲城止於正宮立郎爲天子林爲丞相分遣將帥徇下幽冀移檄州郡於是趙國以北遼東以西皆從風而靡及光武自薊得郎檄進邯鄲勦之屯其郭北門郎數出戰不利漢兵遂拔邯鄲郎夜亡走道死

後漢書光武晝臥邯鄲溫明殿耿弇入造牀下勸卽位

光武北至中山留耿純邯鄲是時郡國

多降邯鄲者純怒人懷異心悉燒其廬舍光武聞而歎息之

光武擊銅馬賊吳漢將突騎會清

陽寇恂與景丹定清河

建武二年叔壽擊五校賊於曲梁戰歿

杜茂擊五校賊進降廣平又同王良擊之於清河平之

明帝永平十七年春甘露降於清河

和帝永元七年趙國曲陽地裂
十六年四月戊午客星犯紫宮西行至昴清河王子安帝卽位
之兆

順帝永和四年清河郡蝗
六年二月彗星見癸未昏西北歷昴畢應清河劉文之亂

清河趙騰順帝時上言災變譏刺朝政坐誹謗收繫所引黨輩八十餘人皆當伏法楊震張皓上疏
申救帝悟減罪

蘇章有故人爲清河太守行部將按其姦贓乃設酒叙歡曰人皆有一天我獨有二天章曰今日與
故人飲私恩也明日按贓事公法也遂舉正其罪

質帝時清河人宗景以曆紀推言水災而僞稱洞視玉版

桓帝建和元年清河劉文反殺國相謝嵩欲立清河王蒜事覺伏誅

靈帝中元四年烏桓峭王等攻破清河幽州牧劉虞攻之

中元元年甘陵人反執其王以應張角

獻帝八年袁尙將沮鵠守邯鄲曹操擊破之

文叔夏南陽人建安中爲甘陵丞夜宿水側趙人蘭襄夢求改葬叔夏明循水求棺果於水側得棺半許落水叔夏顧親舊曰若聞人傳此吾必以爲不然遂爲移殯醢而去之

十年袁譚略取甘陵曹操擊走之臨清河而屯

趙綱清河大姓所在爲害陽平令斬之

三國志管輅至列人典農王弘直署有飄風高三尺餘在庭中幢幢旋轉問輅輅曰東方當有馬吏至恐父哭子如何明日吏到直子果亡又有雄雉登直內鈴柱頭輅曰到五月必遷至期直果爲渤海太守 廣平劉奉林婦病困已買棺器時正月也輅占曰命在八月辛卯日日中而婦漸差至秋發動一如輅所言 輅族兄孝國居斥丘輅往從之與二客會占其必死後二人飲酒醉牛驚

墜車溺漳河死

魏太子郭夫人弟爲曲周縣吏斷盜官布法應棄市太子數手書爲請罪都尉鮑勛不敢擅縱敢具列上太子恚望免勛

曲周民父病以牛禱縣結應棄市都尉陳矯曰此孝子也表赦之

季雍清河人以鄒叛袁紹而降公孫瓚竟爲朱靈所擒誅之

邯鄲人王烈入河東抱犢山得二石室有素書兩卷烈不知其字不敢取譜十數字形體歸以示稽叔夜夜盡知之烈大喜仍偕叔夜往失石室所在

魏黃初年清河婦化鼃入于水

晉武帝泰始年甘露降于清河 五年五月辛卯朔廣平大風折木

懷帝永嘉年石勒渡河攻清河等處廣平太守邵肇降

愍帝建興年張賓說石勒掠廣平諸縣野穀

石勒時雨雹起西河至於廣平大如雞子平地三尺滂上丈餘行人禽獸死者萬數樹木摧折禾稼蕩然

成帝咸和八年五月星隕于肥鄉

穆帝永和七年石琨攻冉閔將王泰於邯鄲敗績翟貞率其衆北走邯鄲

帝奕太和年清河太守賀耕叛於定陵以應翟遼

孝武太元八年慕容農及楷奔列人起兵農奔列人止於烏桓魯利家乃詣烏桓張驤說之同舉大事盡驅列人居民爲士卒斬榆爲兵裂裳爲旗使趙秋說屠各畢聰及劉六等各率兵數千赴之集衆至數萬驤等因共推農爲使持節都督河北諸軍事長樂公丕使石越將兵討農衆請治列人城農曰善用兵者結士以心今起義兵當以山河爲城池何列人之足治也辛卯越至列人西農使趙秋綦母騰擊越前鋒破之向暮農鼓譟出陣於列人牙門劉木先帥壯士四百騰柵而入農率大衆隨之大敗秦兵斬越首送於垂三月慕容垂築新興城於肥鄉以置輜重

北魏太祖天興四年斥丘獻白鹿

太宗永興二年十月嘉禾生于清河

道武帝皇始三年廣平太守遼西公元意烈與郡人韓奇謀反賜死

太武神廬三年清河羣盜殺太守

趙準反煽動廣平諸郡

高祖延興八年清河郡獻白雉

文帝卜遷都崔吉等請都鄴帝曰南有枉人東有列人北有柏人君子不飲盜泉惡其名也遂止清河崔爲四姓之一皆衣冠所推孝文重之

庾狄士文授貝州刺史法令嚴肅吏人股戰有京兆韋焜爲貝州司馬河東趙達爲清河令並苛刻惟長史有惠政時人爲之語云刺史羅刹政司馬蝮蛇瞋長史含笑判清河生喫人文帝聞而嘆曰士文之暴過於猛獸竟坐死

高帝詔七姓不得自爲婚清河崔氏與其二

薛忱代人爲廣平太守爲治暴虐曾因公事殺一家數人民訟之將治罪遇患卒

後魏書宣武時邯鄲置煮鹽竈

世宗延昌二年甘露降于清河

李波廣平人宗族強盛殘掠生民前刺史薛道撈親往討之波率其宗族拒戰大破撈軍遂爲遁逃藪公私咸患百姓爲之語曰李波小妹字雍容褰裙逐馬如卷蓬左射右射必疊雙婦女尙如此男子那可逢相州刺史李安世設方略誘波及諸子姪三十餘人斬於鄴市

孝靜帝武定元年車駕薨於邯鄲之西山

魏孝靜帝者清河王之子帝未卽位時有童謠云可

憐青雀子飛入鄴城裏後果都鄴宮室未備卽逢禪代

孝靜帝三年五月清河郡木連理

四年廣平郡木連理

北齊文宣帝天保年醴泉出於清河

七年廣平清河二郡螽蟴損田

齊後主武平三年龍見於邯鄲井中其氣五色屬天

北齊書齊後主武平四年於邯鄲築宮第侈極麗後宮侍御千餘人皆寶衣玉食

後主高緯雅

好傀儡謂之郭公時人戲爲郭公歌曰邯鄲郭公九十九伎倆漸盡入滕口大兒緣高岡稚子東南走不信吾言時當看歲在酉及將敗果營邯鄲

宋遊道將還鄴會霖雨行旅擁於河橋遊道於幕下朝夕宴歌行者曰何時節作此聲也固大痴遊道曰何時節不作此聲也亦大痴

清河東有曲隄成公一姓居之羣盜多萃於此人爲語曰寧度吳會稽不歷成公曲隄宋世良守郡盜奔他境民又謠曰曲隄雖險盜何益但有宋公自屏跡云

隋煬帝大業年清河賊趙君德作亂

唐高祖武德二年八月竇建德陷洛州徙都之後與秦王戰敗伏誅建德漳南人少尙氣俠膽力過人爲鄉黨所歸附會募人征高麗建德選爲二百人長同縣孫安祖殺縣令亡抵建德官司捕逐建德乃入高鷄泊中爲羣盜郡縣悉收其家屬殺之建德亡歸高士達爲軍司馬士達死建德悉併其衆至十餘萬人數年間盡有河朔地乃因宗城人獻元圭建國號曰夏紀元五鳳定都洛州築萬春宮居之結好王世充奉表皇泰主諡煬帝爲閔帝立楊政道爲郕公送蕭后及南陽公主傳字文化及首于義成公主待淮安以客禮還同安公主於唐朝及世充廢主自立乃與之絕武德三年唐兵圍洛陽世充遣使求救建德引精兵十餘萬救世充遣書秦王請罷兵相拒累月凌敬請渡河取懷州河陽然後踰太行趨蒲津關中震駭鄭圍自解妻曹氏亦力贊之建德不從遂決戰大敗於牛口渚被創墜馬爲唐兵所獲士衆潰散曹氏與左僕射齊善行將數百騎遁歸洛州餘衆欲立建德養子爲主又欲剽掠民間還向海隅爲盜善行不可於是運府庫帛於萬春宮東街以散將卒士卒散盡然後與裴矩曹旦帥百官奉建德妻曹氏及傳國八璽併破字文化及所得珍寶降唐秦王破洛